

Rapport annual 2015 Biblioteca populara Mustér e contuorn

Che bibliotecas ein buca mo instituziuns absolutamein necessarias, mobein mintgaton era «loghens cun utilisaziun sensibla (OMEN)» (mira www.bafu.admin.ch) – ha nossa biblioteca stuiu sentir igl onn vargau. Il schaner han numnadamein laders rut en tier nus, la stad han ins anflau asbest en biblioteca ed igl atun essan nus daventai il punct central dalla casa da scola: ils bischels vegls dil scaldament han mess nus per duas jamnas ord funcziun. Aschia che nus havein tuttavia buca saviu selamentar da memia pauca atenziun (e lavur).

Nus havein denton buca seschau irritar ed havein la fin digl onn fatg tutta honur al proverbii:

NOMEN est OMEN (mira sura) – il num ei program:

Per la finiziun digl onn han nossas colluvreras creau in pigniel da Nadal legendar e (nun)describibil ord cudischs; el secumponeva da 688 cudischs ed era 2 meters aults – quei ha ei aunc mai dau en Surselva. Massa visitaders han fatg honur al pigniel ils 29 da november, e Helena Lozza da Mustér ha gudignau nossa concorrenza ed il canaster «Ursin».

Jeu savess ussa pia finir mui rapport annual 2015 cun ils plaids NOMEN est OMEN = AMEN, denton fuss quei empau anticipau ed il rapport in tec scursanius.

Opras e strias

Igl avrel ha Iso Camartin raquintau ad in publicum interessau historias sur dalla veta e la carezia el mund dalla musica. Dalla Notg da raquents svizra ils 13 da november han ils scolars dalla 3. e 4. classa da Mustér, Medel e Tujetsch striunau in meglier mund per nus, e quei gest la notg dils attentats terroristics a Paris. Con bein fagess cheu in AMEN, il qual ha la medema muntada ella religiun cristiana sco era ella islamica: aschia seigi ei – sche Dieus vul – ed ils carstgauns sin quest mund savessen viver in sper l'auter en pasch.

Scolas e Puntreis

Striunar e fascinar lein nus era nos scolars, affons e giuvenils, ils quals fan regularmeindiever cun lur famiglias e classas da Mustér, Tujetsch e Medel da nossa purschida actuala. La nova cruna ch'ei vegnida endrizzata aposta per ils cudischs d'affons e giuvenils possibilitescha a nus da presentar la litteratura romontscha a moda pli surveseivla ed attractiva. Nus engraziein alla Banca Cantunala Grischuna ed alla Fundaziun Winterhalter per il sustegn finanziel.

In'autra cruna havein nus medemamein empleniu cun cudischs. Il zercladur havein nus quasi fatg in outsourcing. Nus vegnin regularmeindiever a metter a disposiziun als cussadents dil Center da sanadad Puntreis ina schelta da cudischs – cunzun cudischs illustrai – per investa e per far diever. Engraziel fetg per la collaboraziun.

| statistica | 2015 | 2014 | 2013 |
|--------------------------|--------|--------|--------|
| emprests | 13'784 | 13'430 | 15'393 |
| novas medias registradas | 867 | 816 | 709 |
| novas entradas | 54 | 33 | 38 |

Igl ei reussiu a nus igl onn vargau d'alzar levet schibein il diember d'emprests sco era las entradas. Las uras da lavur prestadas ed indemnisadas en biblioteca muntan a ca. 1'150. Dasperas vegn ei adina aunc prestau lavur voluntaria supplementara.

Jeu engraziel cordialmeindiever a mias colluvreras per la collaboraziun engaschada. Per ellas secapescha ei da sesez da star a disposiziun per engaschis spontans, occurrenzas da scola e

scoletta, da Mats e da Bamupi e per auters arranschaments. In cordial engraziament era per la confidanza ed il sustegn dalla vischnaunca purtadra da Mustér e dallas vischnaucas vischinontas da Tujetsch, da Medel e da Sumvitg.

Igl AMEN s'auda en baselgia – ad in bien SEVESER/SELEGER/S'UDIR en biblioteca.

Christina Bischof
schaner 2016